



止園集卷二十一

延陵吳亮采于甫著

贊

懷古陳公像贊

藹乎貌之春陽也卽之溫然而其衷則堅見好色而不能遷瞬乎志之秋霜也持之介然而其神則恬當赫聲而不敢先置恩怨于弗校蹈禮義而無愆依依孺慕儼羹墻于堂構翩翩僊舉藏丘壑于城廛名埒汝南德婉潁川不言備四時之氣無懷游三代之前覩斯像者必曰古之人古之人吾願爲之執鞭

山園集 卷二十一  
懽喜地主入贊

意得軒渠意不得軒渠蓋無不可乎一世而又奚碍乎六虛其志徐徐其樂于于清風穆如何可一日無其此君之徒與

文峯圖贊

董氏舊有文武一峯其以邦大夫意輸之學宮者武峯也文峯尚存僅圃世世守之先王父尚寶公會爲說以貽兩峯翁今八十五年所矣一再傳而汝龍兄以文岩自號蓋取諸峯以自况而復作圖以昭世德命余題數語以志世講余不敢以不斐辭贊曰

誰鞭海東樹之廣除匪繡匪雕壁立負隅風稜戍削而衷則虛武能飲羽文堪覆書疇謂此君爲耳目娛矯矯元龍其文炳如興雲蔚蒼飛霞鬱紆爲鵠之印爲驪之珠貽厥子孫比于貞瑜拜而頌焉亦猶吾祖之緒餘

文

晉陵公建賢侯祠上梁文

六龍振鐸禮樂弘先進之規五馬褰帷豪傑應中興之運蓋經術飭吏行將崇雅黜浮祀典徵賢寧止合離萃渙愛遺東里真一代之惠人政美西門後百年

而思我稽信史稱潁川之四長傳循吏列儒林者三人興校革心榮陽無竝逮之獄閉閣思過高陵有共棄之田召父化成漢羞兩郡文翁教洽蜀建專祠惟二千石之良係億兆人之命凡茲應宿靡不承風欲旌往以詔來每居今以考古恭遇太府歐陽公神峯瑤峻學海珠澄業顯千乘尚書譜傳六一居士建侯赤縣移守朱方鹿逐熊以隨轡馬如羊而却廐政先舉廢理鐘簋于蔡蕪德尚闡幽振衣冠于草莽講堂肇啓將經正以興民寢室宏開更洗心而藏密少長咸集彬彬然尚齒尚賢經史間陳颯颯乎言詩言禮

臯比乍設欣逢百世之師隼節造膺莫借一年之寇先生自此升矣小子又何述焉歸而求之有餘肯教墜地學然後知不足恐廢半途向後同心願吾儕常如此日從前屈指任斯道凡若而人稽文獻而足徵遡典刑之尚在輿情允協欲報政而未能廟貌聿新各捐金而無恡乃堂乃構幸塗墍之旣勤彼几彼筵諒潢汙之可薦禮崇尸祝神遇羨牆或聞而知或見而知道脉相承于從政乎何有爲鄉之士爲國之士古人可論是尚友者宜然會精意于兩楹之間九原復作悟微言于一室之內千載如存維時月應斷壺

山園集 卷三十一  
星臨管室周官授矩以揆日郢人運斤而成風櫨桶  
環縈納流雲于上棟桁梧綺錯挹明月于中庭特宣  
都許之勞用代奚斯之頌梁之東吳峯高倚聖人宮  
秋風萬寶歸金母春雨羣芳藉木公梁之南鐘聲遙  
和白雲端惟馨俎豆傳千禩有美冠裳共一龕梁之  
西辛水朝堂六秀齊勿剪甘棠常蔽芾無言桃李自  
成蹊梁之北斗山在望爲民極謠衢擊壤樂年豐鑿  
井耕田忘帝力梁之上太史占星干氣象當年絳帳  
未生塵此日緇衣重授粲梁之下大明揭日無長夜  
風聲特樹狄公碑月旦同歸樂氏社伏願上梁之後

人稽既往吏習已成式瞻簠簋之光益普茲歌之化  
招攜白屋闢道岸以同登獎誘青衿窺義園而遐集  
徐孺下陳蕃之榻無植私人單父間宓賤之琴尚求  
益友歎龍門以霧會安得鷲其翰而威鳳其音附驥  
足以雲蒸奚取蝨于庭而陽鱗于室善政寧如善教  
勉追渤海之縱愛道尤甚愛身恪守澹臺之節過我  
門不入我室豈憾于無刺無非行其庭不見其人一  
在乎時行時止前有父後有母凡血氣莫不尊尊親  
親上爲德下爲民長國家庶幾樂樂利利邁德音而  
遠嗣衍道化以宏敷無負徽猷永垂懿範

上國集 卷二十一 四  
祭文

祭鄂國公文

惟神英智絕倫勇畧冠世委身惟一盡心無二錫封鄂國發跡鄩陽功垂保障代享蒸嘗其以巡方拜于祠下低回有懷馳驅靡暇綱維大節卓爾精忠庶幾文德寧詎武功議祀賢祠躋之俎豆厥伐開先其儀啓後繫神如在鑒此微誠適逢大比忽顯異徵闡棘深巖排簾直入點頭朱衣彈指柳汁雲中諸士三年不鳴陰騭默佑二雋同升其忝衡文快覩生色豈某之能惟神之力特陳醴齊式薦明馨興文偃武永藉

神靈

鄉同年合祭沈韞所文

人亦有言君相造命命之不猶誰執其柄或使而行或尼而止止庸何傷胡乃遄死嗚呼仲玉玉質金相穆如條風藹若春陽入對大廷出爲循吏蔽芾甘棠單赤思庇其衷肫肫其象閭閻有魚斯懸有雉斯馴貞不絕俗介不矯世清與和并仁以義濟尚書尺一簡召蓋臣庶幾拔茅依然積薪兩詔重申一官虛擬聖明進賢如不得已維我仲玉能忠能良淵停嶽峙鳳瑞麟祥其維不言言必有中其維不爲爲必有用

荏苒歲月浮沉京華資窮斧罄塗泣朝嗟顯晦有時  
予奪惟令無位匪患莫容何病所可憾者韞抱弗酬  
所可慟者殄瘁是憂天之生材實爲社稷若時登庸  
君相之責進退躑躅禍福紛糾天奪之年人亦奚尤  
某等昔附賢書今聯仕籍惠而好我匪朝伊夕共懷  
輶臆均軫痛腸灑茲兩行酌兄一觴神游帝庭巫陽  
可問天聽若聰兄死無恨科第鵲起箕裘象賢其誰  
不悉又曷贅焉

舊寅合祭呂天池夫人文

嗚呼情有特至數有適然詞未及陳淚如涌泉疇不  
有配惟士作匹晨日宵燈吹齋絳緝疇有有家惟宦  
攸羈南馳北驟左挈右提疇不有職惟翰司染閒局  
浮湛清時偃蹇疇不有病惟醫無良秦越卻走刀圭  
漫嘗疇不有死惟旅逢逆榻柎寧周衿襚匪襲嗚呼  
安人豈命不同宜膺多福迺罹百凶夫子嗜學靈相  
其勤拮据絲麻洗腆藻芹夫子通籍靈相其慎雜佩  
表莊投瓊比潤夫子禔躬靈相其謙恭德是其基禮度  
罔愆夫子操修靈相其儉養醴莪豐綺紈謝豔展矣  
夫子蔚譽鳳池晉秩蘭署待簡楓堦數載淹留一屣  
躑躅鞅掌爲勞進退維谷豈靈不待溘爾相捐匪直

也命不憖者天矧歲龍蛇先殞喆愛抱痛恩斯鍾情  
我輩盡焉心傷竟以身殉是女是母異鄉同盡酷烈  
滋毒徂暑增悲河山迢邈風雨淒其奄棄藐孤誰依  
誰恃黃腸易枯紅顏忽逝慟哉夫子莫贖百身拭淚  
力疾疏叩九闈嗟乎噫嘻人貌榮名天親骨肉何物  
風塵隨波沉陸暫請洗沐以圖窆窀會見拔茅升茲  
積薪賸有瑤芝翱翔雲路默相陰騭克昌胤祚某等  
辱在舊宗誼切情真幽思莫闡鬱臆難申效虔束芻  
薦馨用缶靈爽如存鑒茲清占

祭封侍御湯簡菴文

惟翁上古淳龐當今耄耄完璞未雕素貞弗涅居衆  
能謙與世無涉里閭頌聲邑庭屏跡葆是天倪篤生  
人傑起家科第報國忠節銛金擬剛瑩冰比潔豸繡  
龍章鸞書炳揭迢迢雲中表表風烈庭訓聿昭親心  
孔悅移按閩海洗沐子室依依孺慕載疏陳乞翁爲  
勸駕匪朝伊夕爰示矍鑠于焉拮据父命方嚴王程  
且迫脂車戒途含情賦別持斧入境元兇首殪山嶽  
屹搖風雷迅疾貪墨解綬黔黎帖席方期大行胡聞  
永訣雪涕遄奔匍匐衰經八閩失天萬姓均戚矧忝  
姻聯通家義切宦邸遠羈寸心如結短誄聊敷束芻



載夔臨風薦觴九京何質嗚呼哀哉

舊寅合祭章通叅懷愚

國重股肱卿先喉舌制沿三省班叅九列帝垂清問  
咨爾納言登聞敷奏簡畀各賢激水儲金蘭山挺玉  
惟公毓靈降精鼎族起家通籍長濬厥祥策名高第  
邁運滋昌鰲禁掄材鳳池載筆清譽蔚騰英標迥立  
旣膺妙選升華掖垣辰猷補衮夕拜彈冠入叅諷議  
出董將作言則朝陽動而摧嶽邗之骨鯁卓爾不羣  
嗚乎秋霜剗以春溫遜典兵垣爰司文柄淮南寢謀  
冀北顓俊優游禁闥補過拾遺龍頭豹尾青瑣黃扉

績懋望崇銀臺晉秩夙夜惟寅出納靡忒時聞推轂  
歲若積薪行歌四牡託于勞臣畏此簡書庶幾靡及  
中道馳驅倏忽一蹶清源之許朝露溘先皇華未屆  
廣柳言旋瓦缶喧豗鍾呂委歇惟公大雅逢時之闕  
豈無牖下飾巾待期蕭蕭丹旆望望素輻覓無不之  
公神栩栩何必首丘總歸逆旅所可慟者老成云亡  
九京可作百身願償其等造迹筍班追蹤薇者忽聞  
流訃相嚮咽哽束帛加爵合跽陳詞矯首南雲愀然  
寄思

展先墓文

男自十歲學爲文章服聞嚴訓愛勞備嘗迨二十而廩于庠三十而舉于鄉四十而戰勝于春官之場對大廷而靖獻造臚傳而首倡不入青藜之館猶列紫微之堂愛男者謂男續豹尾而微倖惜男者謂男望龍門而愧惶益福難渝量澤本發祥凡聽命于天者男不敢讓而竭一日之長其聽命于人者男不敢知而安素位之常非不屑乎柔翰其無忝乎剛腸卽爲構之弗肯亦詒穀之有方奉詔遄歸君命是將陟西山而瞻戀圖南溟而翱翔茲當展墓來此荆陽睠焉罔極盡然永傷塚尚缺乎麒麟禮兼用乎豕羊敢敷

心腎式薦馨香

誄

少司徒王公誄

有序代作

歲在甲辰月維丙子明正議大夫資治尹戶部左侍郎見峯王翁塏館舍爾時長公中丞節秉西川終天永抱叔子進士錦游東土愛日彌留存切備夫榮哀拔赴兼乎慶吊九京難作百身曷贖嗚呼哀哉翁諱某字某濟南之新城人也葆胄殷宗錫胤望族系傳臨濟居徙瑯琊明經肇業于潁川嗣緒參藩于邛水德門旣啓慶祚滋昌惟翁教秉鯉趨資雄駿發魯賢

甫薦忽嚙指而愴神黔計遄聞乃悼心而擗踊迨夫  
戊榜登于甲科筮仕李官明刑荆服識袁州之司法  
頌定國之在宥褒剡婁上徵書特簡升華左省傑直  
西掖批敕尾以復入封詞頭而不下黃扉動色白簡  
騰譽其最著者固邦本則獨疏安民者四事議邊防  
則衆推覈實爲一策抑罪勲之驕恣律以小心寬罷  
相之指摘存其大體盈庭畫一通國折衷賴仁人溥  
利之言覩儒者給事之効辛未晉太僕寺少卿隨轉  
鴻臚寺卿秩未越乎尋常顏不違乎咫尺維時長公  
且成進士子能紹父長豈慚卿旣聯佩以趨朝乃分

符而領邑盛美有赫雅懷無兢甲戌擢大理寺少卿  
改南京太僕寺卿當開府而推讓勿遑睠舊都而留  
滯靡憾召還問伯旋躋京兆丁丑始以副都御史巡  
撫湖廣前茅甫臨全楚底定精覈察吏江漢凜其澄  
列慷慨嫉邪山岳割焉震動庚辰擢戶部右侍郎尋  
協理戎政癸未擢戶部左侍郎兼總督倉場允武允  
文折衝寓于樽俎足兵足食彈壓先于輦轂方需大  
用頓懷遐舉疏榮寵渥借言省覲怒焉念報劉之日  
歸歟發反魯之歎蓋是時翁方六十而太淑人劉已  
登大耋加進七箸一日之養三公不易諸子及孫以

入計出使便道就舍若江右長臬鉅鹿太守計部儀  
部兩尚書郎寧晉陽城兩大令印纍纍而綬若若洗  
盞更酌舉觴迭上而翁以萃顛在侍奉太淑人千秋  
懽以此言樂樂可知矣若乃創祠萃渙贍族益損軫  
蓼我罔極之恩敦葛藟猶庇之義下車過里扃戶避  
詬躬御疏布居鮮僕妾又所謂國爵屏貴家獲忘貧  
者矣至于庭聞禮詩世篤貞亮急湍勇退華塗踐更  
父教之忠子能其任中丞公敷歷疆場保釐介藩垂  
三十年旣以牂牁匪茹疆理未綏遄奉簡書經畧草  
昧翁年望八送子萬里分手銜滄杖血共訣驅征馬

而不顧此奔馭而若失豈期一赴絕國永辭子舍國  
恩矢報家禍忽罹嗚呼哀哉某也同里後生通家末  
屬載附年籍夙稱世講橋覆梓承梁頽木壞天不憖  
遺良非細故念久敬而悌營撫長往而悲隕爰狗舊  
典用作誄辭曰

於赫瑯琊遙遙萃胄渤海肇基臨沂毓秀顯允始祖  
厥有姱修徙居新城奕葉綢繆高曾纍纍仁臚載邑志  
啓佑鴻儒首稱國士穎川司教逢掖擅場一經所貽  
五世其昌樹惇靡允聿維燕翼起家高第先此閩閩  
闕闕伊何洊歷叅藩以死勤事厥職用殫恩恤泉扃

介卿太僕惟我司徒掄魁東服方宅苦塊阻對公車  
槁外柴中念此居諸爰及壬戌南宮升僑試理荆襄  
由獄明慎六條廉察五服允明乃膺妙選迺簡掖庭  
門下馭違殿中司直進叅諷議退思補拾明維穆王  
啓泰方亨昌言固本用咎昇平虜陷石州邊患旣棘  
責寔圖功力屈羣策世祿勲裔怙侈宣驕匪霜而寒  
見規則消前有海陵後有新鄭無黨無偏不練不競  
萃亭罷相吹毛孔多人情若此國體謂何惟公片言  
默而調護豈日委蛇老成之故橫空雕鶚或爲鸞翎  
在山虎豹亦著麟祥分佐罔伯乃離青瑣尋遷容臺

似右實左憎茲強項瘁以鞠躬句傳惟謹夙夜在公  
更陟廷尉茲當開府捷徑推賢榮塗郤武一麾留罔  
暫滯周南有馬班如泣止江干追鋒北指爰作大正  
寮簡愴壬后襄齊聖載從人望擢尹王畿寧循趙轍  
游握尹釐清詭消奸捐苛滌冗輦轂肅清貴戚震悚  
帝睠南服填撫楚邦惟予湯沐藉爾助勦絳節碧幢  
繡裳銀鉞躡領百城提衡三尺立剪荆棘坐起瘡痍  
貪墨喘避單赤歌嬉擿伏盜儒平亭宄黨市虎辨讒  
池魚釋枉寢圍旣葺抑讓居勞奏績馳榮奕世爲昭  
入貳地卿踵躋九棘國之大事惟兵與食亦司廩庾

亦詰戎兵文武爲憲社稷是憑翁方顯庸遽請歸省  
親調一菽甘踰五鼎爰降溫旨式鑑悃誠虛位以待  
行且召卿嬰孺驕慕有母垂白乞骸至再聚順惟百  
玉樹盈城金緋滿床爛斑竝舞悅豫且康自有子孫  
自有昆弟孰如我翁倫全社備自有甲第自有書香  
孰如我翁源深流長從良赤松開度綠野登臨侍郎  
起居司馬矧有令子嗣起中丞王國屏翰公侯干城  
遠塞遐衝雲中上谷趣駕去秦驅車入蜀念彼夜郎  
厪我宵衣移孝作忠自東徂西洒淚永泣絕意反顧  
業已委質不遑將父亦有叔子斂錦南宮方頤色養

乃奉考終子姓家號行人路泣絕地承諱昊天銜恤  
翁之生死旣哀且榮翁之存沒亦順且寧漆園大年  
栢房長夜音徽雖邈典刑弗謝某之視翁實大父行  
家聲遜美仕籍踵芳先公先君附驥以起惠而好我  
暨及叔子追悼靡及敬圖不刊託于彤管播之素旃  
嗚呼哀哉

陳母沈宜人誄

有序代作

萬曆乙巳秋某月誥封宜人沈太君卒太君余同舍  
郎陳君承一之母也承一分權虎林報竣燕邸居無  
何念太君輒心動卽移疾歸而太君已捐帷矣嗚呼

哀哉繼配封公誕育繕部稱貴母矣而再膺綸誥則  
以前宜人冢嗣憲副後梅公郎刑曹考績推恩等於  
所生竝稱宜人云憲副公色養太君無二也以故承  
一卽踵貴太君依依子舍不欲爲遠遊承一亦不敢  
家于官子身守闕下者三載惟是權之役以板輿奉  
太君權祿養怡顏僅僅卒歲云何不吊遽及閔凶嗚  
呼哀哉不佞同官爲僚共戚若母敬吊承一而誄太  
君誄不及閨帷古之制也人又有言婦人之德非誄  
不顯爰作誄辭其辭曰

婦主宗壘不虛中壺繼室有聲陰教所本猗歟太君

柔嘉挹損嬪于德門言無出閨鳳占旣協如鴻儷光  
鸞膠允緝如媿嗣皇兼葭竝倚蘭蕙襲芳承家不造  
夫君溘亡呱呱遺孩問誰卒蓄冢嗣亢宗實惟家督  
委命從子伯仲以續

承一幼育于伯兄後梅公

遑閱我公伶仃躑

躑所不卽歿以是藐孤形影相吊攻苦茹荼晨霜冬  
絮飲淚咽鳴願肉白骨用答黃墟伯氏登庸書勲冊  
府譽命自天施及後母禴翟馳榮厥品惟五庶幾怡  
愉迓此純嘏厥子燕翼聿稱鴈行聖善受矩克比元  
方兩戌起家後先頡頏甲第策名數亦適當

後梅甲戌承一

戊戌俱二甲  
二十一  
名  
惟伯之劬絜母之教伯返丘園仲登廊

廟母曰俞哉國恩矢報子舍優游勿謂余髦仲旣服  
采職典玄熊帝曰咨垂其若予工權政弗飭物力漸  
窮往慎攸司惟爾之功萊服始娛潘輿乃御西湖弭  
節南新分署一日之養百順斯聚瓜期旣及王程且  
遽別母就道方還闕庭噬指心動五內屏營移疾徒  
跣軌弗及停邁茲大恤皇天杳冥我聞母德惠問孔  
淑遺澤留捲徽音式穀載享榮華兩膺章服人誰不  
死母死無恧何以報母移孝作忠何以貽子清白自  
躬慟真罔極滄匪無從我陳斯誅託管惟彤嗚呼哀  
哉

啓

請胡座師啓

同門十五人

衡鑑無私拔十而兼得五幘幪有造事一合而生三  
惟門牆荷剪拂之恩敢奕世忘結銜之報捫心永矢  
矯首齊鳴恭惟老師名重斗山功垂河洛搖筆魁三  
象煥乎有文勒史成一經行其無事流沉白馬安瀾  
興瓠子之歌水見青龍利涉起輿人之頌特當帝簡  
載典朕虞矧叅奎壁之藏爰主文章之命辨練光于  
曳馬五色不迷識寶氣于連牛一毫莫爽詎意樗蒲  
之品獲收桃李之班求賢意在得賢心惟爲國知我



恩同生我身幸及門曷飲食之已抱先施之愧式泮  
渙矣敢希下濟之光謹涓吉以肆筵擬輸誠而羞藻  
節當鵷首慚無消暑之珠時借燕閒幸有繞梁之玉  
冀領書紳之雅教願聞曳履之先聲伏候俯俞曷勝  
仰企

候申相公啓

代馮老師作

振鷺克庭俊士策名于上國漸鴻在陸元臣繫望于  
東山幸觀濟濟之人文益仰休休之相度旣通仕籍  
咸屬公門恭惟閣下上德下民先憂後樂奮庸宅百  
揆旁招何止千人寅亮弼三朝平定永貽萬世身雖

暫引明俊民而不讓于仔肩心如有容好彥聖而不  
啻其出口伏念某高山景行流水蒙知兩紀甫逾歲  
適周而在丑十科載啓時承乏于同寅濫厠提衡猥  
叨涉筆僅按圖而索駿詎發刃以解牛簡厥修簡厥  
不修識必資于藻鑑觀其主觀其所主進有類于茹  
征儻五色之眼不迷期一毫之心必盡知人則哲敢  
希歐陽子之明取友必端肯負尹公他之直何幸三  
千禮樂已歸此日之鑪錘苟得一二英賢豈惜當年  
之衣鉢仰體同升之誼大夫薦爲大夫俯酬異等之  
恩國士報以國士敬託魚鴻之便式陳羔雁之羣因

思動植肖翹盡是鴻鈞之覆燾譬如榱楹棟桷更需  
大匠之裁成敢因敦勸以盟心尤切勤思而翹首蚤  
就蒲輪之召尚宏蕪糲之途有如一藝之不庸亦是  
匹夫之弗獲共集多士維貞之慶丕建萬年純佑之  
基

候林大僕啓代

彤庭薦引夢依天上之龍綠野優游身伴雲間之鶴  
惟家食無忘戀主乃邦楨必係思皇矧登延出大君  
子之門豈稱塞在庸衆人之列恭惟門下績偉辰猷  
名高夕拜閱人數百輩獨持西省之權衡去國十五

年共仰東歸之袞繡意者耻一夫之不獲欲其收多  
士以攸奔伏念某幸列門墻得通版籍旣承夏屋感  
晉接之渠渠謬典春闈慶泰來之濟濟風簷易失公  
求士甚士之求公星紀載周後視今猶今之視昔旣  
按圖而索駿豈愛屋而忘烏哲愧知人更歸恩于知  
已取期端友敢負學于端人極知桃李之無私始識  
菁莪之有造德不報者非人也惟我二天道將行歟  
其命耶以吾一日幸免不公不明之誚當思爲剪爲  
拂之由網羅幸辱于品題衣鉢恐沿夫故事文章祇  
爲餘技未足酬知道德莫負初心尚期竭節共利大

人之見無忘小子之裁仰冀幘幘獲聞謦欬俾庶士咸遵規矩不致貽門下之羞則衆人盡剖藩籬猶勝作廁中之報敬因尺牘罄寫寸衷

賀朱相公啓

代

青宮定策共瞻日月之重明黃閣宣麻忽睹乾坤之交泰惟天啓百年之運乃后求一德之臣朝野均懽簪紳胥慶恭惟閣下嶽誕申精星鍾說秀道膺天壽一身恒繫乎安危德爲帝師四海每占其出處乃者宸衷默牖聖政倏新升儲慰九廟之靈置輔備三台之象慶吾君之有子朝覲訟獄咸歸爲天下而得人

麴蘖鹽梅竝用商山重望坐收羽翼之功渭水情殷特簡腹心之任中國相司馬允符夢卜之人情天上集夔龍會見奮庸乎帝載蓋置諸左右亦沿每朝爰立之常儀而需以歲年遂侈盛世舉行之奇事人皆曰賢選于衆聖心自秉乎權衡官不必備惟其人公輔聿新乎鼎鉉在昔熙寧之虛席數月竝拜王韓景德之缺位累旬同除畢寇未有久延曠歲師錫崇朝若相公之于今日者也適當簡注必幸遭逢帝舊學于甘盤奚待肖夢中之象君親見乎堯舜奚忍愛覺後之身已知幣聘之幡然遙想繡裳之顒若伏念某

向貳銓曹茲塵華貫與聞推轂雖爲國而薦賢循分  
據牀實通家之猶子班隨末品喜越恒情敬攄雀躍  
之私肅附鴻飛之便沃朕心用作舟亟濟百川之陷  
溺聞君命不俟駕蚤登十里之沙堤佇看三節之星  
馳行望九闈之日近

復陸宗伯啓

代

恭惟門下天上星精雲間人瑞社膺仁壽四夷亦問  
其起居學爲帝師九列共欽其丰采矧以步趨瞻若  
仰伯夷之直惟清至于典禮闕然羨仲山之明且哲  
迺者宸衷默啓儲位倏升雖九天原廟之靈或四皓

商山之力聿修彛典特眷元臣遙想皇華六傳之榮  
垂及白首百齡之慶嘗考鴻恩孔厚間一修憲老之  
儀未聞鶴笑彌高能三致命官之寵如門下者也某  
聳觀盛事忻遡高風豈荷謙光忽承晉接詎謂循牆  
之職敢徼下逮之仁傾嚮徒勤感藏曷旣廸惟子保  
方國家卜世以無疆貽厥孫謀知福祿引年之未艾  
亟精鼎食以副巖瞻

謝唐王啓

千載風雲瑞氣鍾靈于崧嶽九重雨露奎光映彩于  
薇垣桃李悉在公家薪樗聿稱盛典恭惟殿下南服

分藩東平樂善桐圭胙土沿唐叔之舊封栢嶺開邦  
膺皇明之新命更好賢而禮士乃造俊而作人茲當  
闡棘之秋實有拔茅之慶伏念某斗筭末品襪線微  
材謬典賓興偶乘人乏謹按圖而索駿詎辨氣于連  
牛幸報賢書仰酬帝簡豈意咸登之日猥蒙晉錫之  
恩極荷謙光可勝震惕謹銘心而戴德敢稽首以颺  
言某無任感激屏營之至

復王代巡啓

振鷺克庭桐栢榮生花之筆乘驄載道菁莪承偃草  
之風咸屬公門久欽仕國恭惟臺下廟廊重噐海岱

奇珍近聖人之居宗師一世代天子之狩整肅百僚  
寧詎爲墨綬之儀刑抑且作青衿之楷範高山仰止  
東與泰以俱登中土甄陶甫及申而竝降已慶泰來  
之濟濟猥叨晉接之渠渠伏念某襪線微才章縫末  
品偶緣人乏謬典賓興恐五色之眼易迷期一毫之  
心必盡黜浮薄如王旦明公正其人矣薦洛陽之賈  
生不佞豈其裔乎尚藉帡幪共襄薪楨譬如榱楹棟  
桷紛紛匠使更需衡度于主人且思動植肖翹種種  
萌生總賴栽培于造物因承筐而鳴謝謹伏軾以披  
衷仰冀淵涵可勝冰惕

山園集 卷二十一  
候王相公啓

伏以星臨南極明王發黃耆之思雲臥東山太傅繫  
蒼生之望應五百年而名世與處台垣衍八千歲以  
爲春咸登壽域恭惟閣下鳳麟協瑞河嶽儲精四海  
具瞻萬邦爲憲歷三遷而入相取日虞淵同一德以  
格天作霖商野迺袞衣信宿西人寄慨于鴻飛而綸  
綍傳宣中使特修乎燕饗十年休沐而大臣法小臣  
廉甫介懸車之日且一疏陳情而周公前魯公後允  
諧戲彩之懽共仰碧山學士之生申寧止絳縣老人  
之紀亥凡叨門屏竝侍尊罍而某奉簡書未遑華祝

遙指海東而企望恍若方平之往來新從塞北以言  
歸但詢君實之安好特馳一介之使敬上萬年之觴  
伏願順時節宜爲國珍重就車輿以應召賜几杖而  
乞言壽考百年詎止武公之睿聖弼亮四世永作康  
王之父師

答撫院霍南溟

以下按部

辟臺望著飭紀法以憲方制闡名高端表儀而糾  
庶案矧荷雲中之重寄實關天下之具瞻恭惟白臺  
文武壯猷安危注意籌邊禦虜已奏偉伐於玉門疏  
爵通侯宜被隆恩於金闕佇崇登乎八座將永勒乎

千秋某以庸沅獲叨共事幸龍光之日近辱駿惠之時頒拜手登嘉汗顏矢謝欲報之德何以爲期謹伏軾以颺言容執鞭而請益伏惟台炤未旣敷宣

答總督馬鳳麓

決策樞庭四表仰安攘之烈宣威沙漠九夷聞元老之名再辱謙勞不遑異謝恭惟臺下羽儀經國閎闕名家西楚封疆久藉保釐之寄北門鎖鑰更崇節鉞之尊威凜上谷風霜恩自九天日月惟茲狐嶺龍門之巨鎮必需麟符豹略之元臣華夏交懽文武爲憲伏念某猥以菲材偶叨簡命幸通家之世誼微共事

之未光未收空北之竒式賴指南之誨屢承鼎臆兼荷濫詞誦以迴環拜而登受惟深銜結未罄敷陳伏冀台慈俯垂原照

答霍南溟

龍韜豹略久垂塞上之勲虎節魚符迭聽師中之頌謙勞再辱異謝不遑恭惟台臺帝倚金湯時資霖雨文經武緯鞏泰山之四維外攘內安屹長城之萬里淨妖氛而捲甲倒銀河以洗兵麟閣名高疏爵宜同博陸龍門績茂論功寧數嫖姚行且帶山而礪河詎止賜金而橫玉不佞某猥以菲劣奉此簡書愧未展

夫一籌乃頻承平三錫有懷悚仄徒自旁惶附申感  
激之私莫致覲縷之悃仰祈丙炤不任寅忱

答餉部曹還素

恭惟老年文臺下文源翻浪學海驚濤嗣有家風寧  
數河東三鳳蔚爲國器共稱魯國一儒濯從秋水之  
塵玉瑩不染照入寒潭之徹水鑑無私惟茲塞北之  
全儲實倚雲中之半壁駕朱軒而辭輦轂分玉節以  
佐軍興士飽馬騰內安外攘若論功其第一知佐國  
之無雙不佞弟幸附同登更叨共事式藉指南之誨  
聿收空北之奇載辱謙光敢稽異謝附致覲縷之悃  
益深銜結之私欲報未能有懷不盡

答山西按院喬鶴臯

風清烏府山河壯振肅之威塵偃龍沙邊徼藉澄清  
之澤猥慚後乘幸賴前茅恭惟臺下河洛精英三山  
重望筆端颺起長驅憑社之狐袖裏風生直作朝陽  
之鳳持三尺堅如金石陰見現而已消察百僚平若  
權衡木從繩而自直甘雨隨星輶而普渥行邊免恤  
恤于露根陽春從霜斧以豐施過處盡怡怡以平葉  
雖竣雲中之狩爭懷日下之思伏念某翹首幃帷追  
踪綱紀法星移次已違兩舍之遙福曜載涂僅阻一



山之隔未遑濡削載荷隆儀徒踏地以懷慚且循墻  
而知懼拜而登受誦以迴環尺楫耶附于回翔寸抱  
第增于搖曳尚容端布統冀炤原

答山西撫院李玄石

辟車峻秩夙推文武之兼材專席雄班式荷保釐之  
重寄山川改色士庶騰懽恭惟臺下聖傾朝野聲溢  
華夷才猷益暢于綿更勲業茂揚于歷試聿隆與望  
簡在帝心緬惟西土之照臨實係中朝之砥柱指日  
傳晉公之新命普天誦方叔之壯猷不佞某猥以豎  
儒偶叨巖鎮懼顛隳于蚊負幸密邇乎龍光曾濡削  
之未遑荷瑤函之先及拜而登受誦以周環尺緘聊  
附于回翔寸抱第增乎搖曳仰祈崇炤未罄下忱

與喬鶴臯

列栢宣猷山右普澄清之績及瓜報命朝端崇侍從  
之班頌謠已洽于吏民登對且孚于君相恭惟臺下  
瑞鍾嵩嶽望重斗山豸一角而觸邪威生採藿鳳千  
仞而下德澤遍芾棠豈三晉之獨有二天乃兩鎮之  
戴如一日行行且止長安爭避花驄皇皇者華上黨  
共攀車馬風清驛路春滿河汾伏念某叨附後塵幸  
徼餘庇飛騰漸遠時瞻瑞鳥之儀慕戀彌深聿記神

羊之迹敬馳尺素肅布寸忱捧日彤庭望斗曷勝其  
仰北觀風紫塞臨岐尤切於指南統冀台慈俯垂鑒

昭

與餉部楊華毓

恭惟臺下德重岷峨文昭參井趨鯉庭而承學瑞起  
鳳毛接烏府以齊名光生鴈序特被中朝之簡而司  
上谷之儲關西奚愧四知一塵不染塞北共遵三約  
伍卒無譁縉弁均懽邊庾永賴弟某夙叨教愛今喜  
追陪萍蹤幸聚於他鄉芹獻擬將於別署三薰以候  
廿日爲期伏冀寵臨可勝榮藉

與督撫回賀

節鉞拜金門安攘素雄於九塞兼葭倚玉樹紀綱寔  
藉於三台屢塵溢美之詞更荷錯珍之惠感鏤肺腑  
報乏瓊瑤恭惟台臺天挺人傑聖世文宗體象黃裳  
共仰匡時之略樞分紫塞聿兼獨坐之尊卓哉當代  
夔龍允矣禁中頗牧某樗櫟末品襪線微才祇奉宸  
綸最苦激揚之典專銜簡命更難經緯之功夕且乾  
乾日惟凜凜佩折衝於尊俎今固無期酒籌畫於珠  
璣心懷至願敬修魚素用申趨步之誠溷瀆龍光敢  
謂報施之稱伏希台鑒曷任歡騰

與曹還素回賀

才裕邊儲偉略獨雄於塞上情殷年譜豐儀先下於  
雲中五內難忘八行莫罄恭惟臺下清時砥柱名世  
實臣緯武經文走龍蛇於筆底安邦裕國富兵甲於  
胸中宣德三雲敷恩九塞貔師萬旅曾無枵腹之虞  
虎甲千屯共戴投醪之惠蓋民生國計之宜灼如觀  
火而士飽馬騰之績捷若應機某襪線微才樗櫟未  
品茲承簡命共事疆場乃辱高情先施朔漠未效瓊  
瑤之報聊申藜藿之私伏惟莞存曷勝忻慰

答霍南溟賀大閱

壯猷夙抱廟堂隆推轂之權鉅鎮孤懸帷幄仗運籌  
之畧鞞譯載涂而輸欵旃裘交臂以乞降恭惟台臺  
匡國蓋臣應時名世敦詩書悅禮樂窺聖域之妙而  
探其心安邊境立功勲塞武夫之口而奪之氣允矣  
北門之鎖鑰巍然上國之長城某海瀕豎儒菰蒲下  
士綉斧叨承庸駑是懼榆塞觀風方媿澄清之未效  
楓宸懸日何堪簡閱之再承忽驚珍貺寵頒遠厓溫  
詞再辱瑤函璀璨燦恍挹台光深荷注存曷勝鐫刻謹  
望風而登受聊據案以攄忱伏惟崇炤不任神馳

答曹還素賀大閱

恭惟臺下望隆山斗聲著巖廊緯武經文允矣士紳  
推重安邦定國衰然年譜增光爰簡注於朝中來督  
儲於塞北邊庾有賴伍卒無譁某海滋豎儒菰蒲下  
士綉斧叨承庸駑是懼榆塞觀風方媿澄清之未效  
楓宸懸日何堪簡閱之再承忽驚珍貺寵頒遠厯溫  
詞再辱瑤函璀璨恍挹台光深荷注存曷勝鐫刻謹  
望風而登受聊據案以攄忱伏惟崇炤不任神馳

答山東按院蕭念野

白簡時巡彈壓夙嚴於霜斧彤庭報命澄清允協於  
天闕龍節增輝烏臺生色恭惟臺下天鍾黼黻性裕

經綸威稜凜烈於風霜獻納高懸於日月暨泰岱一  
聞郢調而海表遂失齊雄厚德回春立起納溝之瘠  
直聲動地行贍避路之驄駿猷再著於名藩鴻望久  
推於內席帝心簡在士類皈依不佞某猥以非材肩  
茲重鎮愧激揚之無術矧戇直之難容稅駕何時債  
轅滋懼過承珍貺屢辱溫詞勤施已被乎再三報塞  
未伸於萬一勒微衷而志感拜尊命以懷羞肅布謝  
私仰祈台鑒

賀蘇松按院鄧來沙

璇霄明法象光膺玉綽以觀風繡斧肅清霜瑞擁花

上國集 卷三十一 三十一  
驄而按部懽騰遐邇慶溢簪紳恭惟老公祖臺下正  
氣峻嶒貞心粹白讜論力扶國是英摹丕振臺綱結  
帝深知聿掄材於中秘代天巡狩爰執法於南邦百  
城草木增輝一路風雲動色將爲社稷之重寧止山  
嶽之搖伏念某蚊負微能鵠班弱羽含香執簡虛叨  
共侍螭頭攬轡登車更幸追隨貂尾斗山仰止竊私  
淑於受屢雲樹蒼茫愧齋申乎賀厦敬裁不腆肅致  
未將輶賚爲慚鑒涵是荷

答真定撫院趙見田

辟車峻秩夙推文武之兼材專席雄班式荷保釐之  
重寄睠以股肱之首地宜求心膂之世臣寵錫巖廊  
懽騰瀛海恭惟老年伯臺下名世宗工清朝舊德巖  
巖特立操持素秉乎剛方濟濟同升進退必依於孝  
友蓋當東山之愛日已需北闕之甘霖允協輿情晉  
膺簡命寧詎聯塤篳以合奏且將躋鼎鉉以咸登何  
意明時覩茲盛事不肖某才同樗櫟臭附芝蘭遙瞻  
父執以景行久佩師言而祇服昨從驛傳獲傾三十  
載之闊踪茲荷駿頒復塵八百里之厚貺拜嘉有愧  
銘鏤無涯遙望洪涵敬申謝悃臨楮不勝感仰瞻依  
之至

與撫院連少嵩回席

行役塞垣攬轡愧澄清之烈遭逢幕府披帷升樞密  
之堂寵溢登龍喜同豫燕恭惟臺下泰階申甫熙世  
夔龍節鉞獨膺丕振六師之壯氣甲兵滿腹永堅萬  
里之長城某久慕下風殊勤山斗冒承榆塞獲遂荆  
瞻徼某事於一時慶良緣於千載謹涓日肅治賓筵  
祇迎法駕席前僭筵精神折樽俎之衝柱後彈冠談  
咲仰步趨之矩順風而請卜日以頒伏冀俯俞可勝  
仰跂

與李玄石回賀

國家居重馭輕肩背卽懸於絕塞都護臨邊拱闕股  
肱斲事於登壇爰咨國老之番番來鎮巖關之翼翼  
恭惟台臺學蔚儒宗才優王佐秋風笳管曾無驕子  
彎弧春雨犁鉏惟有牧人驅犢不獨三晉雲中赫濯  
聲靈盡消反側遂使雲谷上谷跳梁凶醜頓息烽塵  
某自仔肩於朔漠得承懿於風華倚玉誠深懷帡良  
厚頃拜瓊瑤之貺感切銘心茲申芹藻之儀敬將藉  
手伏惟慈炤不任光榮

與曹還素回賀

足兵先足食主計良艱理財在用人出納惟允若師

不宿飽奚可責之禦侮一方必行有暴糧乃可使之  
宣威萬里根本重寄邊徼先圖恭惟老年丈臺下珪  
璋竒質金玉令音大國雄飛雅負安邊之志三雲督  
餉遂司經國之權貴粟實邊必鼂錯能開一時之利  
計口給餉如鄴候克成萬世之功某自負重於朔漠  
得承懿於風華倚玉誠深懷悌良厚頃拜瓊玖之施  
銘鏤心 茲肅芹藻之悃敬謝光榮伏惟慈涵可勝  
感哉

答霍南溟

樞分紫塞聿兼獨坐之尊體象黃裳爰篤同舟之誼  
恭惟台臺間值忠貞性生骨鯁鑑明而塵垢不止黑  
白昭彰旌指而腥羶莫逢妖氛屏跡虎豹之威逾振  
犬羊之魄潛消是爲聯方呂之蹤而接范韓之武者  
也某惟末品猥佐下風夙駕星軺殊慚風節最苦激  
揚之無術更難安攘之周防詎意寵施頻加菲劣覩  
瑤華之飛墜惟覺目眩神搖承筐篚之儼臨直用銘  
心感德三薰勒狀九頓陳詞餘俟面宣伏祈心照

與山西按院劉貞一

璇霄明法象光膺玉綍以觀風綉斧肅清霜瑞擁花  
驄而按部懽騰遐邇色躍河山恭惟臺下命世人豪

山園集 卷二十一  
凌霄品格讜論力扶國是英摹丕振臺綱結帝深知  
從日邊而授鉞伐天巡狩向重鎮以揚旌紫氣遙臨  
三晉屏藩轉壯紅雲浮動十連兵甲增雄軍民欣見  
乎節旄首虜驚聞乎姓字某夙叨肝鬲之愛不減手  
足之情咫尺龍光阻修魚素聊陳賀悃肅候台禧望  
重澄清鴈代幸瞻真御史勲隆輔弼槐扉佇拜大天  
卿某臨楮曷勝忭仰之至

與楊華毓賀壽

景星耀彩欣逢鶴算之初長計府懸弧喜見鴻禧之  
倍錫歡騰中外慶動華夷恭惟老年丈藝苑飛英蓬

萊毓秀經文緯武裒然邊塞干城足國籌邊允矣朔  
方鎖鑰茲當萬類發揚之會值嶽神誕降之辰浮瑞  
氣於雲中茂衍無疆之祐光紫微於天上長膺不老  
之符第某情深昆季喜倍尋常欲效華封之祝莫遂  
見趨謹陳沼沚之毛用伸燕賀伏惟鑒納不旣光榮

答劉貞一

擁旄榆塞欽持斧之芳名蜚翰栢臺荷貺金之殊寵  
光增白磧感勒丹衷恭惟臺下神力回天忠心貫日  
栽花滿縣夙稱一路福星簪筆中臺特被九重湛露  
秉衡三晉已看山岳之動搖折衷兩京行見風波之



山園集 卷二十一  
偃息憂國共期于師濟當官力挽乎紛紜一鳳自鳴  
羣狐悉屏不佞弟心懷獨往義切同舟偶致芹將旋  
煩遽使華槭燦琳瑯之簡佳貺倍瓊玖之儀拜以迴  
環愧而增結附申謝悃伏冀台涵

與趙見田回賀

節鉞拜金門安攘素雄於九塞兼葭倚玉樹紀綱寔  
藉於三台仰辱溢美之詞更荷錯珍之惠感鏤肺腑  
報乏瓊瑤恭惟老年伯臺下天挺人傑聖世文宗冠  
冕人倫聲價允推月旦羽儀中外勲名直上凌煙卓  
哉當代夔龍允矣禁中頗牧某樗櫟末品襪線微才  
祇奉宸綸最苦激揚之典專銜簡命更難經緯之功  
夕且乾乾日惟凜凜佩折衝於尊俎今固無期洒籌  
畫於珠璣心懷至願敬修魚素用申趨步之誠溷瀆  
龍光敢謂報施之稱伏希台鑒曷任歡騰

答原任大同撫院張助所

卿月騰輝西塞褫旃裘之膽德星反照中州修初服  
之心澤潤蒼生席虛紫塞恭惟台臺跨海羽翰昂霄  
棟榦憲萬邦而作范合三省以揚休決策運籌寢四  
郊之多壘定盟合欵堅千里之長城豈期痛抱於終  
天遂爾遄奔於不日人傳純孝帝鑒精忠方推轂以

登壇復懸車而旋里共嘆干戈之未息冀看袞繡之  
重來不佞叨役邊陲夙欽山斗未遂登龍之願忽承  
繫雁之章拜以迴環對之皇悚謹循墻而登領祗踏  
地以懷慚肅勒蕪詞恭陳謝悃伏祈崇炤不宣

答楊華毓回壽

老年丈毓山川之靈秀應運肇生協麟鳳之禎祥際  
時現瑞安邦裕國風清榆塞之塵永錄添籌光藹蓬  
萊之島某猥以庸庸夙叨恩庇密瞻型範幸竊甄陶  
喜遇令辰媿寸忱徒抱遙申華祝冀百禩方新稱觴  
之禮尚虛介壽之祈正切詎期野獻復辱珍頒華札

鏗鏘並麗蕃駢之錫瑤函溫郁爰生寒谷之春九頊  
首以登嘉百結胸而佩德慙榮交集淵嶽難酬附使  
起居臨風瞻切

答楊餉部賀端陽

拭露和津命縷應天中之節折花競巧長絲逢地臘  
之辰惟昌時協景物維新故令德與陽明並盛某雲  
中瞻睇幸芳蕙之將承塞上奔驅慚盤菰之未展迺  
辱台眷枉厖鴻伴筐綺羅珍拜命如承蘭沐華絨麗  
澡著心何啻靈符謹勒蕪函用鳴謝悃伏冀電炤曷  
任屏營

答督撫賀端陽

青園列嶂槐榆蔚蔚映堯天綠遍芳洲杜若依依披  
舜日苜華泛酒千家齊醉太平年楚粽傳香萬竈咸  
歌豐樂歲竊念某徒負激揚之任慚無振肅之能仰  
元老之餘休救補不逮荷台臺之渥惠戴履何堪龍  
鑑無私合照乾坤俱作鏡鷺陂已廢放生江海盡爲  
池賜並玉壺冰豈靈符神印之可擬德茂金莖露何  
長絲細葛之能酬捧寶軸之雲來荷珍遺於日下戒  
涼殊歉飯賜增慙九頃登嘉一言申謝某無任懷仰  
瞻戀之至

與督撫賀端陽

刻蒲紀節芳馨清徹於初晨採艾懸門淑氣鬱陰於  
華府况茲邊徼之地更當虜款之秋沙漠庭空奚待  
辟兵書鬼字垣城鎖固何須神印記靈文嘉景難逢  
良時不偶某涉遊川谷祇聞競渡之聲感荷光旻有  
愜奉衣之願望轅門而烹鵞思獻隔雲天而宴玳無  
從九子粽傳走一介之行李五色絲燦兆千歲之遐  
齡是惟俯效曝誠故敢冒陳芹菲伏祈台鑒曷勝邈  
瞻

止園集卷二十一終



